

La Pagina

da Surmeir

ECONOMIA

emda
50

HOTEL GRAVA SAVOGNIN: ampresa badigleida

Antschet vign cun la meisa radonda

pb. L'emda passada, siva tgi la Uffer SA veva preschento alla radunanza communal la versiun definitiva digl hotel Grava, è stada l'ampresa badigleida. Pero betg scu usito segl plazzal da biagier, mabagn aint igl gôt.

Igls responsabels vevan anvido las medias per l'ampresa badigleida dalla construcziun digl hotel cun 70 tgombras e 200 letgs a Savognin/Grava. E las medias èn neidas. Percheigl tgi schi dat a Savognin igl cass tgi vign betg angal preschento en project, mabagn antschet a realisar, alloura vala chegl an mintga cass en'annunztga.

Hospitants da chesta conferenza da pressa eran per eneda Enrico Uffer cun la sia interpresa scu iniziand e scu construeider digl project. Alloura Martin Meyer CEO dall'interpresa ITW digl Principadi da Lichtenstein tgi svilupescha projects d'immobiglias e tgi funcziunga cò scu investor. Ed alloura Gerhard Wendel tgi è igl schef dalla JUFA Hotels, en'interpresa tgi magna gio 60 hotels da famiglia tgi on gia igl 2019 1,9 miu. pernottaiziuns. L'interpresa austriaca è principalmaintg activa ain-
cuntinuaziun p. 2



Ena planta tarada an pe dad ena ampresa badigleida, ena furma tottaveia betg usitada, ma adattada per igl nov hotel a Savognin/Grava tgi vign construa an lènn: (sa san.) Severin Niederberger, Andrin Kubli e Peter Janutin.

SURVISTA



Per juvenils cun difficultads ...

... è nia fundo avant 12 onns ad Alvagni l'instituziun Nido del Lupo. Ena instituziun per sutigneir juvenils tgi on fadeia cun lour conturn usito. Els vignan sustignias an tots gros ed ossa da nov spezialmaintg per la tscherna digl mastier. Persiva dattigl en program spezial.

9

Igl gôt è ena sfida per igls cumegns

Eneda la funtanga principala dallas antradas. Oz en unfant tgi fò chitos. Tranter la funcziun e l'economia forestala dattigl discrepanzas.

10

Puspe ena fiera d'advent

Da chellas dattigl savens ed anblers lis. Ena pi gronda è stada sonda passada a Savognin. Ed ins ò laschea plascheir e niro a cuntinuar.

12



Gerhard Wendel declera la filosofia digls JUFA Hotels e tgi igl hotel a Savognin/Grava seia igl ampren da chels hotels tgi vign ad esser an Svizra.

ten l'atgna tera, pero er an Germania, Principadi da Lichtenstein ed Ungareia. Igl hotel a Savognin/Grava vign ad esser igl ampren an Svizra e da nov vign igl onn proxim er anc veters Luxemburg. La JUFA Hotels è s'oblleida per contract da manar 25 onns igl hotel a Savognin.

Igl ampren pass è igl principal

Preschaint alla conferenza da medias ed all'amprema badigleida è er sto Leo Thomann, igl mastral da Surses. Per el e pigl antier cumegn seia chegl en de da plascheir. Igls davos onns seian divers projects per hotels nias iniziias, ma alla finala betg realisos. Ins era adegna en po tranter sperar e tameir. Igl cumegn vegia investo blier davos onns ainten l'infrastructura turistica. Ed ossa finalmaintg vigna fatg cun l'amprema badigleida igl ampren pass per la realisaziun d'en hotel. E chel ampren pass seia igl pi impurtant. Per dus ulteriours hotels dettigli gio ena lubientscha da biagier. «Nous ischan persvadias tgi cotras so la spirala negativa ainten las frequenzas turisticas neir frenada. Chella tendenza negativa è perfign gia consequenzas segl spital regional», è managea igl mastral. Ossa ins spera ferm tgi geia finalmaintg ainten l'otra direzziun.

Enrico Uffer, igl construeider digl hotel è managea tgi igl antier project seia ena labour da team. «Nous lagn screiver comunablamaintg en'istorgia da success». I seia betg sto simpel, mabagn ena pulita sdualada anfignen tgi tot seia sto schinavant tgi ins possa ossa antschever definitivamaintg. Ins vegia lia antschever gio chest aton cugl stgavamaint per dar en segn cler tgi igl project vigna

realiso e tgi geia ossa angal ple anavant. I fetscha ad el er plascheir tgi aint igl quartier da Grava, tgi era anfignen ossa pitost ena zona d'industreia, ins saptga ossa er dar impuls turistics. Ins vegia er do fadeia da pussibilitar tgi vigna en bel hotel a Grava. Cun en plangtera mural e surave lenn tenor la tecnologia da moduls digl Quadrin.

Mintga hotel è en tema regional

Gerhard Wendel, igl schef digls JUFA Hotels è puncto tgi er schi ins vegia ossa massa hotels, schi seian chegl betg products giu dalla stanga. I sa tracta betg da hotels da cadagna. Mintga hotel seia adatto allas relaziuns regionalas e vegia savens er en tema regional. Ins varda dad integrar igls hotels betg angal ainten la cuntrada, mabagn er ainten las relaziuns digl li e da s'adattar agls basigns dalla populaziun e naturalmaintg er digls giasts. Er architectonicamaintg seia betg en hotel scu l'oter. Ins vegia er surpiglia bietgs istorics scu p.ex. en'antieriura fabrica da tubac e fatg ordlonder en hotel. Communabel seia tgi ins veglia esser en albiert per la giuventetna e per famiglias. Chegl tgi igl nom tradescha (JUFA = Jugend & Familien). Er ins s'adattescha savens ad en publicum spezial. Uscheia dettigli hotels tgi dettan gronda peisa alla culinaria, oters vegian la cultura scu tema central e puspe oters sa drezzan agls sportists.

Martin Meyer, igl CEO dad ITW, l'interpresa d'immobiglia digl Principadi da Lichtenstein discorra dad ena gronda cumpetenza da qualidad da lour immobiglias. Ins vegia er realiso da curt la clinica Gut a Fläsch. Ins vegia er en'incumbensa per realisar en hotel da sa-

nadad a Son Murezza. En object da referenza tgi vegia tschertas parallelas cun Bogn Ragaz seia igl bogn da cura a St.Margrethen. Ins seia activ principalmaintg ainten la Svizra tudestga orientala ed igls davos onns ins seia antro adegna pi ferm ainten la branscha da taimp liber e turissem.

Amprema badigleida aint igl gôt

Bagn spezial ve dall'amprema badigleida digl hotel Grava è sto tgi chella è stada aint igl gôt. Ma chegl è sainz'oter gia la sia simbolica. «Schi ins construescha en hotel an lenn, alloura ègl angal consequent schi ins fò chel act aint igl gôt», è declaro Enrico Uffer. Damais betg lò noua tgi igl bietg vign construa cun omens e donnas an retscha cun en bade-gl ainta mang ed en casc segl tgesa. Eneida ena varianta en po pi originala.

Chel gôt sa catta dalla vart dretga tranter Rona e Tinizong tgi ins nomna «Gôt da Rona». Cò è igl selvicultour Peter Janutin retschet igls giasts e las medias ed ins è gist taro l'amprema planta, en bel pegn cun paca roma, 30 m otezza e cun ena vigliadetna da passa 200 onns. «Cun l'amprema planta faschinsa igl principal ve digl hotel: la meisa radonda», è Enrico Uffer detg an spass. Digl reminent dovrigl ca. 700 da chellas plantas per la construcziun digl antier hotel.

Igl selvicultour è er do diversas declaraziuns an connex cun chel territori, chel gôt e las plantas spezialas. Noua tgi ins sa catta seia en territori dad ena bova da crappa avant bliers onns. Perchegl chels crappings dapertot anturn. Per part gronds scu tgesas. «Gl'è en taratsch cun pac humus, blier mestgel e la costa varda vers nord. Las plantas creschan fitg plang ed on cotras ena fitg buna qualidad», è declaro Peter Janutin. Er ord vista istorica seia chel li, noua tgi ins tera las plantas pigl hotel en li spezial. Exact cò passava la veia digls Romans da sid vers nord ed igl cuntrari sur igls pass da Set e Gelgia. Cò gevan suror antieras armadas sen lour expediziuns. Ed ins trasportava digl sid garnezza, vegn, speztgareias, urden ed otras tgosas.

L'amprema planta per la construcziun digl hotel è dastgea tarar Severin Niederberger, ampren dist da bostger aint igl terz onn. Scu ampren dist è el nia da far crudar la planta exact scu planiso. Parallel cun la veia ed uscheia tgi igl pegn croda betg sen crappa e vo per mez. La crudada dalla planta è en represchentants dallas medias perfign filmo cun la drona or dall'aria.

Igls preschaints èn stos impressiunos da chella furma dad en'amprema badigleida ainten en conturn fitg spezial. Er schi las temperaturas eran magari bassas. Per sa scaldar ègl alloura do vegn buglia, caschiel e pagn cun peira anturn la candelas finlandesas. Igls represchentants dalla JUFA èn alloura anc ias ad Altenrhein per piglier igl aviun ed esser gio en'oura pi tard anavos a Graz, noua tgi l'interpresa è la sia sedia.